

1 Tesalonisensem

Ju'u Paplo, bwe'u jo'ara
Tesaloonika' tea'po jo'aaka
Krijtota sualemmeu ji'ohte

1 Inepo Paplo, ju'u Silbaano'
teamtamake intok ju'u
Timoteo' teamtamake, inika'a
ji'osia ji'ojeita, jum bwe'u jo'ara
Tesaloonika' tea'po, Krijtota sualeka,
inime'e itom yo'owa Liojtamak
intok ju'u Jesukrijtotamak eaka
ta'eewaka nau emo totojame,
inika'a nee emou bittua. Itom
yo'owa Liojta betana intok itom
yo'owe Jesukrijtota betana weyeka,
eme'e, juka' emou tu'ik intok
yuma'isi yanti elaka jiapsiwamta te
emo tana a' waata.

Jume'e, bwe'u jo'ara Tesaloonika'
tea'po Krijtota sualeme, tu'isi bem
a' suale'u amet ju'uneiyaawa

2 Jiba itepo enchim si'imem
betchi'bo, Liojta aet bai sae. Intok
itepo, Liojtau bicha nokaka, jiba
enchim nokria. **3** Itom yo'owa Liojta
bichapo itepo, iniat tua aapo'ikut
eaka tektila enchim joa'ubeu intok
ket, tua enchim a' nak ta'aaka,
eme'e yee aniaka jiapsa'ubeu intok
junuen ket, yo'owe Jesukrijtota
betana enchim tu'ik aet bit bo'o

bicha'u, enchim ka a' kopta'ubeu
waatekai te Liojta aet bai sae.
4 Eme'e, Krijtopo itomak werim,
ju'u achai Lios tua enchim eiyaa.
Intok itepo te ju'unea, tua aapo'ik
enchim yeu pu'ariaka'u. **5** Bwe'ituk
junako, itepo juka' Krijtota bemela
nok lutu'uriata, yee jinne'umta
enchim a' majtakai, ini'i, ka kia
noki ausu'likai emou teuwaawak.
Ala ketchia, ini'i, Liojta tu'u jiapsi
utte'ata aet ayuka'ue weyekai. Intok
tua Liojta nok lutu'uriata, wepulsi
a' lutu'uria tuka'po teuwaaritakai.
Eme'e tu'isi ju'unea, emo nasuk
aneka, emo betchi'bo tu'ik waataka
junuen tu'isi itom jiapsaka'u.

6 Eme'e intok ketchia, emo nasuk
aneka, itom jiapsaka'a benasia,
intok yo'owe Jesukrijtota aapo'ik
jiapsisuka'a benasia a' ta'aaka,
eme'e inien jiapsa. Intok eme'e
ju'u alleeri, Liojta tu'u jiapsi emot
a' autua'ue, juka' bemela nok
lutu'uriata a' mabetak. Iniat eme'e
tua jikot emo bichaka jun'i. **7** Inien
weyeka, chukula, eme'e si'ime
wame'e jum bwiaara Maseroonia'
tea'a betana intok bwiaara Akaaya'
tea'a betana Krijtota sualeme,
inime'e, eme'e ju'u Krijtota sualeka
tu'isi enchim jiapsa'ue, bempo'im

emou a' ta'aatuak. ⁸Junama'a, emo betana naatekai, ju'u Krijtota bemela nok lutu'uria, ini'i, ka jum bwiaara Maseroonia' tea'po intok Akaaya' tea'po jiba, weye. Ala ini'i si'imekut mekka tajti yuma'alaa. Intok ju'ueewa, Liojta sualeka, enhim aet eaka jiapsa'uta. Inien san ka utte'a emo betana jita junammeu itom teuwaane'e'u. ⁹Ala jiba bempo, emo nasuk itom aneka'u betana, intok enhim junuen tua itomak tu'ika, enhim itom mabetaka'u betana a' teuwa. Intok ket, tua Liojtamak eaka, jume' ka lutu'uriapo liosim yo'oriwame, juname'e enhim am koptaka'po, junuen juka' lutu'uriapo Lios, jiba yuu jiapsamta, a' yo'oreka enhim jiapsi taiteka'po betana a' teuwa. ¹⁰Ketchia bempo, tua enhim juka' Jesujta, Liojta yoemiata, jiba juka' aapo'ik Liojta kokkoarim nasuk jiabijtetuaka'uta, inika'a, teeka betana a'abo a' nottinee'uta enhim a' bo'o bicha'u betana a' teuwa. Aapo Jesus juna'a, ka tu'ik betchi'bo, tua jiokot emo bitnaamta betana ju'u yee jinne'ume.

**Ju'u tekil, jum jo'ara Tesaloonika'
tea'po, Paplota yaaka'u**

2 Jiba eme'e a' ju'ueiyaa, Krijtopo itomak werim, itom aman emomak aneka, ju'u emo nasuk itom yaaka'u, ka kia beja a' ya'awaka'po. ²Ala itepo, ka binwatuka jum bwe'u jo'ara Piliipoj tea'po junuen tiusi jiokot joosuaka juni'i, jaibu enhim a' ju'ueiya'a benasia, junama'a ju'u Lios, aapo'ik betana juka' bemela nok lutu'uriata, kaitat Jain eaka emou itom a'

teuwaane' betchi'bo aet itom ania. Junuen tua aet itom beje'ewa' nasuk juni'i. ³Bwe'ituk itepo tee, ju'u itom yee majta'u betana, katte ji'oplamtaka, intok kia itepo, kaita ka tu'ik weetuabaeka, intok kaabeta ae bai ta'aabaeka itepo yee a' majtak. ⁴Junuen tu'eka su, ala ju'u Lios inia betana itou a' tu'ureka intok, inia yee jinne'uka, aapo'ik nok lutu'uriau itom yeu pu'ak. Intok itepo, jiba inien tee yee majta. Itepo, katte inim jabeta alleetuaka ito uttiabaeka'ea. Ala itepo, Liojta, juka' yetet ju'u itom ea'ut ju'ueamta alleetuabae. ⁵Enchim jaibu ju'uea'a benasia, itepo jakwoo juni'i tee ka itom enhim sual i'aka ujyoisi emou nookak. Intok te kia kaitat jiawiteka tomita emou waatak juni'i. Ju'u Lios jaibu iniat itot ju'uea. ⁶Itepo jakwoo juni'i, inim watem betana yo'oriwaka itom eiyaaala'uta tee ka a' jaiwa. Kia emo betana intok kia watem betana juni'i. Junuen itepo, Krijtota betana itom naas bittuarim tuka' betchi'bo au lutu'uriaka, jita'apo enhim a itot tekipanoanee'u juni'i. ⁷Ala itepo, katte bettesi emomak jiapsak, taa senu aewaita, ili a' yoemiam tu'isi a' yo'oturia'a benasia enhim eiyaka enhim bichakai. ⁸Itepotee inien tua enhim eiyaa ta'aakai, itepo, katte kia juka' Liojta betana bemela nok lutu'uriata jiba enhim a' majtabaa ean, taa kia emo betchi'bo su'awak juni'i, te kaachin jii. Bwe'ituk itepo tua enhim nak ta'aasulamtakai. ⁹Krijtopo nemak werim, eme'esu ju'uea, aman emo nasuk anekai, ite ito ania betchi'bo,

bettesi item tekipanoaka'ut. Junako itepo, taewait intok tukaariat naa buusti te tekipanoak. Junuen, ketun juka' Liojta bemela nok lutu'uriata item enchim a' majta'u tajtia, ka enchim itot obisi eene! betchi'bo.

¹⁰ Jiba eme'e, intok kia ju'u Lios jun'i'i, a' bitlataka ju'unea, enchim jume' Krijtota sualemmak aneka, itepo, Liojta bichapo aapo'ik betchi'bo jiapsaka, intok wepulsi lutu'uriata bo'o jooriaka item jiapsaka'u. Junuen emo nasuk, kaabeta jitat itot nokne! betchi'bo.

¹¹ Ketchia eme'e ju'unea tua item enchim si'imem, ka enchim ko'om eene! betchi'bo, intok ka ta'abwisi eaka, Krijtota enchim yo'ori ta'aanee'u betana item emou nokaka'u, junuen, senu yo'owawaita a' yoemiam a' ania'a benasia.

¹² Itepotee, inim wame'e Liojta betana yoemiarimtaka, inime'e aapo'ik betchi'bo bem jiapsi'ea'a benasia, junuen enchim emo uju'une! betchi'bo tee emou noksuk. Lios, jiba aapo ju'u, teekau yo'otaka a' kateka'u, ujyooria, jiapsiwamta enchim aamak a' bitne! betchi'bo enchim yeu pu'akame.

¹³ Inia betchi'bo itepo, jiba Liojta te bai sae. Bwe'ituk junako, eme'e, juka' Liojta betana bemela nok lutu'uriata, item enchim majtaka'uta, a' jikkajakai, inika'a eme'e, Liojta betana a' nok lutu'uria tuka'uta, intok ka inim jabeta betana a' weye'ut ju'uneaka, a' mabetak. Intok, tua lutu'uriapo ini'i nok lutu'uria Liojta betana weyeka intok, enchim, jume' a' sualemmet, ta'abwisi enchim jiapsituaka emot yeu machikai. ¹⁴ Eme'e, Krijtopo

nemak werim, junako, chukula eme'e, jume' emo benasi yoemem, enchim bwiaarapo jomem betana jiokot emo bichakai, junak, jiba wame'e aman bwiaara Jurea' tea'po Krijtota sualeka, Liojta yoemiam nau yaajame, jiba junuen bem emo bichaka'u benasi emou yeu siika. Bwe'ituk bempo ket junuen, jiba jume' ame benasi jurio yoemrata betana jiokot bitwak. ¹⁵ Jiba ini'i jurio yoemra junuen juka' yo'owe Jesukrijtota, kuuset a' poponaka a' me'aak. Jiba junuen, bat naataka, wame'e Liojta betana ju'neetuawaka nokame ameu bittuarim bem am su'aka'a benasia. Item intok bempo mekka beebak. Intok inime'e, Liojta beje'eka, ka a' alleetua, intok kia inim kaabetamak tuttu'i. ¹⁶ Bwe'ituk, item, jume' ka jurio yoememmeu bempo'im ket jinne'uim tune' betchi'bo, item ameu nokbaeka'eao, inime'e ka item a' joo i'aka item beje'eka aane. Intok inien aneka, bempo, Liojta bichapo juka' ka tu'ik bem ya'ari, a' bu'uria. Taa i'an si'imekut chukula, Liojta betana weyeka jantiachika, juka' tua jiokot machika bem bitnee'uta ameu yuma'alaa.

**Ju'u Paplo, jum jo'ara Tesaloonikapo
Krijtota sualemmemeu, juchi
ameu noitibaeka'ea**

¹⁷ Krijtopo nemak werim, junakriapo, itepo chuubaa ka juebena ta'apo enchim to'o saka'alamtakai itepo ka emomak aneka juni'i, jiba te aman emot jiapsekan. Intok itepo, tua tee juchi aman emomak anpeak. ¹⁸ Junama'a itepo emou kat jiji'obek. Jiba

inepo Paplo, jaikisi nee aman emou noitibaek, taa ju'u bebeje'eri junaet ka itom yeu yuma'atuak.
19 Bwe'ituk ju'u itom bit bo'o bicha'u intok tua itom alleenee'u, intok ju'u tu'ik itom bichaka junae itom ito uttianee'u, jiba eme'e juname'emtune, chukula juka' itom yo'owa Jesukrijtota a'abo a' notteo.
20 Junuen weye, eme'e juname'em jume' jiba betchi'bo itom alleenee'u intok tu'ik itom bitnee'u.

3 Junako itepotee ka intok a aet bo'o bichakai, ite, jum bwe'u jo'ara Ateenaj tea'po tee itepola ama tawababaek. **2** Intok junama'a, juka' Krijtopo itomak werik Timoteo' teamta enchim aman bitne' betchi'bo emou a' bittuubaek. Bwe'ituk aapo, Liojta betana a' tektila joaka, itomak tekipanoaka, Krijtota betana weyemta yee majta. Intok aapo, junuen, ka ko'om eaka intok ka ta'abwisi eaka, Krijtota bichau bicha enchim a' sualne' betchi'bo a enchim ania. **3** Junuen emou nasuk, ju'u bettesi machik emou weyemta betchi'bo, kaabeta, Krijtota bem suale'u betana bem ko'om eene' betchi'bo. Bwe'ituk jiba eme'e ju'unea, inim inile benakut, jiokot itom ito bitnee'ut. **4** Junako ketchia, itepo ketun emomak aman anekai, junuen, inien jiokot itom ito bitne'eti jiaka te enchim etejoriak. Intok ini'i tua junuen yeu siika, jiba enchim a' ju'uneiya'a benasia. **5** Inia betchi'bo junako, inien emot in ju'uneepa'ut ka intok bo'o bitpeaka, inepo, Krijtota enchim suale'u betana tu'isi enchim jiapsa'uta aman enchim ju'uneiyaabaekai, nee senuk aman

bittuak. Bwe'ituk inepo, jumak juni'i, ju'u bebeje'eri, jita ka tu'ikut am ji'optualaa ti eakai. Intok junuen emo nasuk tekil itom ya'ari, kia seja ya'atunee ti eakai.

6 Taa i'an ju'u Timoteeo' teame junaman bwe'u jo'ara Tesalonika' tea'a betana a'abo nottekai, intok aapo emou betana nokta tu'ik, Krijtota enchim suale'u betana intok ju'u enchim yee nak ta'aa'u betana itom a' ju'uneiyaatalaa. Junae betchi'bo te tu'isi alleaka taawak. Junuen aapo, tua junen jiaka enchim itom bitpeaka enchim itou waate'uta, itom etejolaa. Jiba junuen itom ket enchim bitpea'a benasia. **7** Inia betchi'bo, Krijtopo itomak werim, itepo, juebena obisi intok bettesi intok tua itom jiokot ito bicha' nasuk, itepo, enchim ka ta'abwisi eaka, Krijtota bichau bicha enchim suale'u betana ju'uneaka, yuma'isi itom yanti ela'u itot aayuk. **8** In'i, inien enchim yuma'isi, ka ta'abwisi eaka, Krijtota enchim suale'uta, enchim itom ju'uneiya'a, ito betchi'bo juchi yuma'isi jiapsiwame. **9** Junuen san, kaachin tee, itepo, yuma'isi a' bai sae juka' itom yo'owa Liojta, emou betchi'bo intok tua yuma'isi alleewamta aapo'ik betana itot ayukamta betchi'bo. **10** Itepo, taewait intok tukaariat juni'i, enchim aman bit betchi'bo, Liojta itom a' aniane'u betana, tua junen jiaka, te au bicha ito nokria. Intok junuen, emomak aneka, enchim Krijtota suale'u betana, ketun jiokot enchim aet emou bicha'ut, enchim aniaabaekai.

11 Jiba aapo ju'u itom yo'owa Lios, intok ju'u itom yo'owe Jesukrijto, a itom aman enchim bitne' betchi'bo,

item aniane.¹² Intok aapo ju'u item yo'owa, che'a juni'i yuma'isi, wepulsi Krijtota enchim sualnee'ut, intok che'a juni'i yuma'isi enchim naas emo naknee'ut, intok si'imem enchim naknee'ut, enchim aniane. Junuen, item tu'isi enchim nake'e benasia.¹³ Aapo, ka wooo weemtat enchim jiapsinee'ut, intok wepulsi Liojta betchi'bo jiba, enchim jiapsinee'ut, enchim aniane. Intok item achai Liojta bichapo, ka tu'ik kaita ya'arikai enchim yeu machine' betchi'bo, chukula, aapo'ik juka' item yo'owe Jesukrijtota, si'ime wame'e aamak jiapsaka, aapo'ik attearimmak, a'abo ko'om a' notteo.

Jaisa jiapsiwaka, Liojta ae allea'u

4 I'an intok, Krijtopo nemak werim, yo'owe Jesukrijtota betana lutu'uriaka, tee inia betana enchim tejwaaka emou nokbae, achai Liojta yo'oreka, jiba a' alleetuaka enchim jiapsinee'u betana, jiba item enchim majtaka'a benasia, intok ket i'an enchim jiapsa'a benasia, jiba junaen, bichau bicha che'a juni'i enchim aet jiapsine' betchi'bo.

²Bwe'ituk eme'e a' ju'uneiyyaa, yo'owe Jesukrijtota betana weyemta, a' bo'o jooriawa'uta, aapo'ik betana aet tejwaarintakai, junak juka' item enchim majtaka'uta. ³Juka' achai Liojta emo tana a' waata'uta, ini'i, si'imeku wepulsi aapo'ik betchi'bo jiba enchim jiapsinee'uta juna'a. Kaabe, jamutta ka a' jubeka aamak au tu'uribaane. ⁴Eme'e si'ime, we'epulaka enchim jujubimmak nau, wepulsi Liojta betchi'bo jiba

enchim jiapsa'uta ju'uneaka, intok am yo'ori ta'aaka amemak jiapsine.

⁵ Intok eme'e, ka wame'e ka Liojta yo'ori ta'aaka, bem jiapsa'a benasi jiapsine. Wame'e ka tu'ikut jiapseka, Jain juni'i jaamuchim tu'ureka, amet emo ta'arume jiapsa'a benasia. ⁶Emo betana kaabe junuen, inien weyemta betana juka' Krijtopo aamak werik bai ta'aabaane. Bwe'ituk item jaibu enchim tejwaari benasia, ju'u item yo'owa Lios, si'ime inile benakut, tua bettesi yee jiokot emo bittuanne.

⁷Bwe'ituk ju'u Lios, ka juka' tua tiusi machik ka tu'ik item joaka jiapsine' betchi'bo item yeu pu'ak. Ala wepulsi aapo'ik betchi'bo jiba, tu'ik joaka item jiapsine' betchi'bo. ⁸Junuen san, ju'u, inika'a yee majtawamta, ka a' mabetaka, omola a' tawaame, ka inim jabeta, ala juka' Liojta inien bitne, aapo'ik juka' a' tu'u jiapsiwata itot autuaritae, wepulsi ae betchi'bo jiba item jiapsituamta.

⁹Taa inika'a Krijtopo nau werim nasuk emo nak'ewamta betana, inepo kaita nee a emou ji'ojte. Bwe'ituk jiba aapo ju'u Lios inia betana, emo nasuk enchim naas emo naknee'ut enchim aet ju'uneiyyaa. ¹⁰Bwe'ituk eme'e su, si'ime jume' Krijtopo emomak werim, si'imeku jum bwiaara Maseroonia' tea'po joomem, jiba inien am nake. Taa junuen taka juni'i Krijtopo itemak werim, itepo inia betana enchim emo nak ta'aa'uta che'a juni'i emo nasuk a' aune' betchi'bo te emou nooka. ¹¹Eme'e inim kaitat Jain eaka intok we'epulaka, emou aukamtat jiba

emo temaeka, enhim jiapsinee'uta jariune. Eme'e enhim maammea tekipanoakai, jiba inia betana itom enhim tejwaalatuka'a benasia.

¹²Junuen, si'imeem betana, jume' ka Krijtota sualeme betana tu'isi enhim bitna' betchi'bo, intok junuen kaita'po enhim jiokot eene' betchi'bo.

Juka' Jesukrijtota jaisa a' yebijnee'u

¹³Krijtopo itomak werim, wame'e Krijtota sualeka kokkokame chukula juka' ameu yeu weama'u betana, inika'a tee enhim ju'uneiyyaa i'a, junuen ka enhim siok'eene' betchi'bo, wame'e waatem, ka Krijtota sualeme ane'e benasia. Inime'e, chukula bem bitnee'ut ka ju'uneiyyaame.

¹⁴Junuen itepo, juka' Jesujta mukilataka intok juchi kokkoarim nasuk a' jiabijteka'uta a' sualekai, ket jiba junaen itepo, juka' Liojta, chukula Jesujta notteo, wame'e aapo'ik inika'a sualeka kokkokame, aamak kat betchi'bo, inime'e a' jiabijtetuanee'uta.

¹⁵Inia betchi'bo san, itepo inika'a, jiba Jesukrijtota betana a' jikkajilamtakai, emou a' teuwaas. Inika'a, itom jume' chukula aapo'ik yo'owe Jesukrijtota a'abo a' notte'u tajtia inim jiapsame, itepo, katte jume' Krijtota sualeka kokkolam bepat bat teekau jikau itom nuk saka'anaa'uta bitnee.

¹⁶Bwe'ituk jiba aapo ju'u itom yo'owe Jesukrijto, teeka betana, yo'o nesawekai, intok senu ankel ya'ut, intok Liojta betana sisi'iwook kusiata jiutuaka a'abo nottine. Junako, wame'e Krijtota suaheka

kokkolame, inime'e, kokkoarim nasuk che'a bat jiabijtene.

¹⁷Inimmet chukula, itepo jume' ketun inim tawaka inim jiapsame juni'i, inime'e bempo'immak nau itepo namummeu jikau toboktanaa. Intok junuen itepo junaman jekapo, yo'owe Jesukrijtota ko'om weyemtau nanki betchi'ibo. Junuen itepo, yo'owe Jesukrijtotamak jiba betchi'bo aamak jiapsine. ¹⁸Inia betchi'bo eme'e, inia teuwaaritae emo nasuk kaabeta ko'om eene' betchi'bo, emo jiapsi joaka nau a' teuwaas sakane.

5 Taa inika'a inia betana jita ta'apo a' yuma'anee'u betana oo jita wasuktiaitchi, Krijtopo nlmak werim, ka utte'a inia betana in emou ji'lojtenee'u. ²Eme'e inia betana tu'isi ju'unea juka' taewaita, yo'owe Jesukrijtota aet a'abo a' nottine'uta, tua ka au waatiwao a' yuma'ane'po, ju'u jita e'tebwamta, jita etbwabaeka tukaapo weye'e benasia. ³Junako juka' yoemrata: "I'an inim, yanti jiapsiwame ausu'li intok kaita jinilwame", ti am jiao, junak junama'a seej chukti, inimmeu, tua jiokot lu'utekame benasi, a bem jinne'uimtunee'uta jiba betchi'bo a' ta'arune. Jiba jume' wantiam, jamutta yeu kiktebaemtau yumaka'a benasia intok inime'e kaachin ama yo'eene. ⁴Taa eme'e, Krijtopo nemak werim, jiba inia betana, machiku aneme benaka, jaibu inia betana a' ju'uneiyyaa, junuen juka' taewai, Jesukrijtota aet a'abo a' yebijnee'uta ka enhim a' etbwa nu'un'e' betchi'bo. ⁵Bwe'ituk si'ime eme'e, Liojta betana nok lutu'uriata ju'neaka

intok tu'ik bo'o jooriaka jiapsaka, eme'e, taewai machiku jiapsame bena. Katte tukaapo ka machiku jiapsame bebena. ⁶Inia betchi'bo katte inim ka ju'uneame benasi, kia beja jiapsine, jume' waatem ka Krijtota sual ta'aaka, kokocheme benasi jiapsa'a benasia. Ala itepo, Liojta bichapo ka tu'ikut ito suuane. Intok inim ju'u itom jiapsa'u betana, ka yeupo benasi a' eiyaakai, oo kia kokocheme benasi anekai. ⁷Maa su, jume' kokkocheme, tukaapo kokkoche. Jume' intok nanaakome, inime'e tukaariat nanaako. ⁸Taa itepo, Krijtota betana nok lutu'uriat ju'uneaka, itepo taewai machiku jiapsame benaka, itepo inim itom jiapsa'ut, ka yeupo benasi a' eiyaane. Itepo, Jesukrijtota sual ta'aaka intok inim yee nak ta'aaka, iniae te ito suuane, junuen juka' sontaota, nassuabaeka, sisi'iwookie tawit ae au a' ania'a benasia. Intok itepo, ketun inim jiapsaka, ka tu'ik betana itom jinne'urimtunee'ut bo'o bitne. In'i ito betchi'bo, ju'u sisi'iwook mo'obe'i, sontaota kobat ae au a' anika'u benakai. ⁹Bwe'ituk ju'u Lios, ka ju'u chukula tua jiokot yee a' bittuanee'u betchi'bo itom yeu pu'ari. Ala aapo, yo'owe Jesukrijtota yaaka'ue, itom jinne'uimtunee'uta itom a' bitne' betchi'bo itou a' chupak. ¹⁰Aapo ju'u itom yo'owa Jesukrijto, ito betchi'bo a' jiapsi nenkak, junuen, aapo'ik notteo jume' ketun inim jiapsame intok kia jume' kokkosukame juni'i, jiba betchi'bo aapo'ikumak nau itom jiapsine' betchi'bo. ¹¹Inia betchi'bo eme'e, emou nasuk, kaabeta ko'om eene'

betchi'bo intok si'imem junuen che'a yuma'isi Krijtota enhim sualne' betchi'bo emo ania sakane, i'an tajtia enhim a' joa'a benasia.

Ju'u Paplo jume' Krijtopo nau werim sua tejwaa'

¹²Krijtopo itomak werim, jume' emou yo'owem intok emou nasuk tekipanoaka, Krijtota betana weyemtat enhim anika intok tu'isi enhim jiapsinee'u betana emou nokame, inime'e, enhim am yo'ori ta'aane' betchi'bo te emou nooka. ¹³Intok eme'e, inime'e, tu'isi am bichaka tua am nakne, bempo'im juka' tekilda bem joa'u betchi'bo am eiyaakai. Si'ime eme'e nau tuttu'ika, alleaka nau jiapsine.

¹⁴Ketchia Krijtopo itomak werim, ika'a te enhim ya'a i'a. Wame'e kaita joaka jiapsibaeme, eme'e ameu nokne. Wame'e mammajeka, ko'om eame intok wame'e, Krijtota sualeka taa kee tu'isi aet utte'itume, junae betana am aniane. Intok eme'e, ka seej chukti eaka, si'imemmak tuttu'ika a bo'o bitne. ¹⁵Iniat eme'e emou suuane, ka tu'ik nat notnottawamta a' kaitatunee'utchi. Ala eme'e si'ime, emou nasuk tu'ik enhim emou joorianee'ut, intok inim si'ime jiapsame, naas inien enhim am bitnee'ut jiapsine. ¹⁶Enchim jiba yuma'isi alleaka jiapsinee'u emot aune. ¹⁷Eme'e, Liojtau bicha jiba enhim noknee'uta, ka a' koptane. ¹⁸Eme'e, si'imeta juka' emou weyemta betchi'bo, Liojta aet bai saune. Bwe'ituk inien weyeka juna'a, ju'u, achai Liojta, jume' Krijtota sualeme

a' joo i'a'u. ¹⁹Eme'e, Liojta tu'u jiapsita, aapo'ik emo nasuk ju'u tu'ikue au a' ju'uneiyyaa tebo'u betana, eme'e ka a' beje'eka ka a' lu'utituane. ²⁰Eme'e, wame'e Liojta betana ju'neetuwaka nokame, juka' bempo'im emou noka'uta, ka jak wa'am a' eiyaaka a' jikkajine. ²¹Inia betana, eme'e, si'imeta juka' enchim jikkaja'uta, aet suuane. Intok inia betana eme'e, waka'a ama che'a tu'i machik aamak tawane. ²²Eme'e, si'imeta, jita juni'i, juka' ka tu'ik betana, ka a' eiyaane.

²³Jiba aapo ju'u achai Lios, yanti elaka jiapsiwarita yee bittuame, aapo, tu'ik ausu'llik emchim bo'o jooriaka, wepulsi yuma'isi aapo'ik betchi'bo enchim jiapsinee'ut enchim aniane. Intok ket aapo, Jesukrijtota juchi a'abo a' notte'po tajtia, enchim jiapsi intok enchim tu'i'eeru intok enchim takaa, yuma'isia, jita ka tu'ik kaita emot

ayukai, ae bichapo enchim anne' betchi'bo enchim aniane. ²⁴Aapo ju'u Lios, aapo'iku bicha enchim yeu pu'akame si'imekut a yoem eiyaatu. Intok aapo, si'imeta inia betana inien emou a' chupne.

**Ji'ojtesuka am tebotua intok
Liojta betana ameu tu'ik a'awa**

²⁵Krijtopo itomak werim, Liojtau bicha eme'e itom nokriane.

²⁶Si'ime jume' Krijtopo itomak werim, itom am ibaktariaka, itom am tebotuariane.

²⁷Yo'owe Jesukrijtota betana lutu'uriaka, inepo nee inika'a ji'osia ji'ojteita, si'ime jume' Krijtota sualemmeu enchim a' nokne' betchi'bo nee emou ujbwana.

²⁸Aapo ju'u itom yo'owe Jesukrijto, aapo'ik betana juka' emou tu'ik enchim a' bittuane. Tua junuentune.